

秋

巖

詩

集

秋
巖
詩
集

四庫全書珍本初集

別集
集
類部

欽定四庫全書

集部五

提要

陳秋巖詩集二卷

別集類四元

臣等謹案陳秋巖集散見永樂大典中然不

著其名亦不著時代考焦竑國史經籍志有

陳宜甫秋巖集當即其人而爵里則終無可

考集中接劉介臣書詩云幾回夢裏尋君去

三尺書來約我歸閩海浪肥春雨過和林沙

遠曉雲飛則當為閩人又有庚辰再隨駕北

行二詩庚辰為至元十七年則元世祖時嘗

為侍從又有讀元貞改元詔詩丙申十月扈

從晉王領降兵入京朝覲詩考之元史丙申

為元貞二年晉王名噶瑪喇

案噶瑪喇原作甘麻剌今改正

裕宗長子天性仁厚御下有恩王府官屬自

內史以下俱請命天子不敢稍專嘗出鎮北

邊叛王永和爾

案永和爾原作岳未忽兒今改正

等聞其至

望風請降至元二十七年封梁王二十九年
改封晉王所云領降兵者應即此事則成宗
時又為晉王僚屬其詩多與盧摯姚燧趙孟
頤程鉅夫留夢炎等相為倡和而諸人詩乃
罕及之其始末遂不可復詳矣原集焦志作
一卷然篇什稍多疑其字畫偶誤今據永樂
大典所存者編為上下二卷其詩大抵源出
元白雖運意遣詞之深刻奇警之致而平正

通達語無格礙要自不失為雅音也乾隆四

十六年九月恭校上

總纂官

臣紀昀

臣陸錫熊

臣孫士毅

總校官

臣陸

費墀

欽定四庫全書

秋巖詩集卷上

元 陳宜甫 撰

樂府歌行

飲馬長城窟

我來長城下飲馬長城窟積此古怨基悲哉築城卒當時掘此深望望築城高紫紆九千里死者如牛毛骨浸窟中水魂作泉下鬼朝風暮雨天啾啾哭不已昔人飲馬時辛苦事甲兵今我飲馬來邊境方清寧馬飲再三

嗅似疑戰血腥昔人有哀吟吟寄潺湲聲潺湲聲不住
欲向何人訴青天不得聞白日又欲莫此恨應綿綿平
沙結寒霧

望鄉歌寄盧疎齋

天漠漠兮夜茫茫草蕭颯兮金風涼白日淡兮霧慘沙
磧冷兮雲黃有人兮獨立而惆悵悲歌兮南望而思鄉
邈孤鴻之影滅兮書不得而遠寄驚兔走之伏莽兮那
思馳騁而發狂上駝車于半坡渺啞軋之餘響認寒廬

之幾點兮浮炊爨之烟蒼天將寒兮感物變歲欲暮兮
單衣裳三載不浴兮黧瘦質之塵垢鬢根點雪兮亂飛
蓬之秋霜心一去兮萬餘里望不及兮雲飛揚懷千載
之向上兮人已云遠留萬古之遺恨兮綿綿久長高臺
荒兮哀李陵節旄落兮感蘇郎蔡琰悲憤兮兒呼母而
失聲公主悲歌兮願為鵲而騫翔彼丈夫女子之不同
兮其情況則一耳今我之念昔兮誰後我而悲傷奉天
宇之開廓兮去留野鶴之容易垂我王之憫顧兮總歸

吾土而徜徉如醉夢兮意撩亂重悵望兮迴中腸悵望
兮苦歌思之沉鬱抱琴兮託遺調于宮商

夜聞隴西歌有懷牧庵左丞

君莫唱楊柳枝遊子多別離君莫唱金縷衣人老更無
年少時自古唱歌易悲感思入碧雲愁黯黯陽關三疊
不堪聞河滿一聲腸已斷君不見大風雲飛揚漢歌思
沛鄉又不見楚王氣蓋世泣下愁烏江英雄勝負總塵
土一樣蕭蕭白楊墓山河大地只如昨歌聲暗促年華

度我來隴西成浪遊寂寞春殘又到秋斜陽已落荒壘
暝片月自照交河流此時旅腸悲火熱隴西歌客歌清
切學將鸚鵡樹頭聲化作杜鵑枝上血寒風不動馬不
鳴餘音嫋嫋含餘情却疑古來出塞曲至今流落傳邊
庭我為沉吟愁不寐懷古思鄉賦歌意歌聲已斷歌思
長白雲衰草天茫茫

氈車行

北方氈車千萬兩健牛服力駱駝壯清晨排作鴈陣行

落日分屯夾氈帳
轍分古道辨東西
白雪黃雲不可迷
後人迤邐循舊迹
那知創自軒轅時
兩輪奔奔如日月
經年輾轉何時歇
輶教沙草綠還枯
幾過河水凍仍裂
江南野客慣乘舟
北來只夢烟波秋
於今天下皆王土
欲得回轅到彼遊

夜靜聽道友董舒隱彈李陵思漢因賦長歌以
寫其當時之意云呈傅初菴

幽人南來彈玉琴
泠泠一曲悲南音
况作李陵思漢調

使我夜聽憂難禁將軍雖云去已久得君為寫千古艱
難心初撚指下纔輕舉黃金殿上聞天語將軍肯行天
子許戰勝良功立須取大絃忽變軒昂聲指揮劒客真
奇兵倏然百騎合爭戰亂箭如雨強弓鳴小絃喑鳴復
抑鬱不覺計窮力應屈微臣慮遠深自謀莫逆帝心果
安出須臾聲答鴈聲長雁來無書徒憶鄉孤忠空照日
耿耿慚愧強謝蘇中郎續續泛音轉迢遞遙望長空幾
千里高臺揮淚落斜陽望斷漢宮五雲起司馬忠言猶

且疑臣心只願蒼旻知臣雖不歸築臺在後人或為臣
傷悲我為聽琴哀此意何況飄蓬沙漠地幾年屢過將
軍臺雲淡霜寒草憔悴今宵聽君彈此曲喜為將軍鳴
不平曲終夜長萬籟靜使我歸興欲戀岩上松風清

四歌行

有父有父溪村居蒼顏白髮七尺軀醉時高歌樂踈曠
家無擔石常晏如東鄰西舍邀即去不復晚景悲桑榆
有兒流落在天末未得歸隱同樵漁嗚呼一歌兮重長

嘆遙望家書寄廻鴈

有母有母年七十家中倚門望兒泣昔年典衣供學書
惟願功名當早立去年縫衣念遠遊老眼穿針恐行急
兒也驅馳荷聖明薄俸寄歸嗟晚及嗚呼二歌兮心悲
傷白雲萬里闌天長

有兄有兄純且良少年餬口遊四方前載相隨遠歸侍
三人戲綵登高堂胡為伯氏早云歿使我不得如鴈行
如今遠求養親祿仲氏有賴常在傍嗚呼三歌兮悲百

種姜被孤寒不成夢

有姊有姊在建陽夫家辛苦事農桑兵後全身喜相見
陳情未已酸離腸留錢漫效故人意悲啼寄語思爺娘
別來三載消息斷也應憶弟留他鄉嗚呼四歌兮懷昔
日抱我聽書近鄰室

五言古詩

初春月寄王眉叟

嬌娥對春初新畫一眉月脉脉天涯心迢迢拜瑤闕微

光射邊壘行客憶離別今年十三度隨處見圓缺料得
山中人憐我冒風雪素衣塵欲緇玄髮星忽忽惟此哉
生明偏照歸心切

涇河詩一首寄王克齋同知

古人云涇水流本渾濁今我來涇州見水繞城郭塵
顏照清泚似怪纓可濯古來有讒士曾厭清流惡

讀灌夫傳呈傅初菴學士

堂堂灌將軍非與侯者儔挺身入吳壘發憤報父讎聲